

INUIT ATAQATIGIIT

INATSISARTUNI



30. januar 2014

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga:

1.

Aktiaateqarluni ingerlatseqatigiiffiit pisortanit pigineqartut pillugit piginnittut iloriusissaannik suliarinnittoqartarnissaanik Naalakkersuisut siuliisa pilersaarutaat Naalakkersuisut nangippaat. Kisiannili Namminersorlutik Oqartussat aktiaateqarluni ingerlatseqatigiiffiutaat pillugit ukiumoortumik nassuiaammi Naalakkersuisut allapput ingerlatseqatigiiffiit Naalakkersuisut suliniutaasa allat assinginik annertuumik suliaqartartut salliutillugit piginnittut iloriusissaannik suliarinnittoqaaqqaassasoq. Naalakkersuisut suliniutaat sorliit aammalu ingerlatseqatigiiffiit sorliit eqqarsaatigineqarnersut erseqqissarneqassasoq kissaatiginarpoq. Tamatuma saniatigut paaserusuppara ingerlatseqatigiiffinnut tamanut piginnittut iloriusissaasa qaqugu suliarineqarsimanissaat naatsorsuutigissaneripput.

2.

Nassuiaammi Naalakkersuisut allapput illuatungaatigut ingerlatseqatigiiffiit patajaallisarnissamik pisariaqartitaasa aammalu nutaamik aningaasaliinissamik pisariaqartitsinissamut naatsorsuutigisat illuatungaatigullu aktiaatillip iluanaarutissatut naatsorsuutigisaasa akornanni oqimaaqatigiissitsineq iluanaarutissanik uuttortaanermi pingaarnertut pisartoq. Tamatta ilisimavarput aserfallatsaaliuinermi annertuumik kingulerunneq ingerlatseqatigiiffiit pisortanit pigineqartut amerlasuut paagaat nutaamillu aningaasaliinissat pisariaqartikkaat. Peqatigisaanillu Nunatta Karsia iluanaarutinik pisariaqartitsivoq. Nunatta Karsiata siunissaq ungasinnerusoq isigalugu iluanaarutinik pisariaqartitsinera millisarneqaqqullugu Naalakkersuisut qanoq takorluugaqarpat? Iluanaaruteqarnissamik ingerlatsineq allanngortinniarlugu tigussaasumik pilersaaruteqartoqarpa?

3.

KNI A/S-ip qullersaqarfiani piisaapiluttoqarsimaneratut ittumik ingerlatseqatigiiffinni pisortanit pigineqartuni allani pisoqarsimannginnera Naalakkersuisut qularnaveersinnaavaat? Ingerlatseqatigiiffinni pisortanit pigineqartuni piisaapiluttoqartannginnissaa anguniarlugu Naalakkersuisut tigussaasumik qanoq iliuuseqalersaarpat?

4.

Naalakkersuisut allapput ingerlatseqatigiiffinni pisortanit pigineqartuni ukiuni kingullerni tallimani sulisunik ikilisaaneq pisariillisaasoqarsimaneranut takussutissaasinnaasoq atuisut akiliutigisartagaasa appasinnerulernerannut pissutaaqataasinnaalluni. Naalakkersuisut ukiumoortumik nassuiaataannit ersepoq ingerlatseqatigiiffinni aningaasarsiat tamarmiusut 2008-mi 1.630 mio. kr.-init 2011-mi 1.582 mio. kr.-inut apparsimasut. Appariaat 2%-iulluni. Piffissami pineqartumi tassani sulisut amerlassusiat 5.732-nit 4.992-inut apparsimavoq. Appariaat 13%-iulluni. Piffissami pineqartumi tassani Namminersorlutik Oqartussat ingerlatseqatigiiffiutaanni agguaqatigiissillugu aningaasarsiat tassa 12,5%-imik qaffariaateqarsimapput. Akissaatit nalinginnaasumik qaffannerinnaannik aamma/imaluunniit sulisunik aalajangersimasunik immikkut ittumik isumagineqarsimanerannik ineriartorneq tamanna pissuteqarnersoq Naalakkersuisut nassuiarsinnaavaat? Akissaatit qaffannerisa ingerlatseqatigiiffiit pisortanit pigineqartut unammillersinnaassusiannut sunniutaat pillugit Naalakkersuisut qanoq eqqarsaatersuuteqarpat?

5.

Illuut A/S pillugu Naalakkersuisut allapput ingerlatseqatigiiffik "aqutsinikkut unammilligassaqarpoq aammattaaq naatsorsuusereriaatsimut sunniuteqartunik." Tamatuma itisilerneqarnissaa kissaatiginarpoq.

6.

Immikkut ittumik Illuut A/S-imut qanittumik attaveqarnissaq Naalakkersuisut kissaatigaat. Taamaamat siulersuisui tassaapput Naalakkersuisoqarfiit pisortaat pingasut. Atorfillit pingasut siulersuisuutinngikkaluarlugit qanimut attaveqarusunneq anguneqarsinnaannginnami? Aalajangiineq tamanna qanoq ililluni siulersuisuni ilaasortat suliassamut pikkorissuseqarnerat tunngavigalugu toqqarneqartarnissaannik Naalakkersuisut kissaataannut ataqatigiippa? Ingerlatseqatigiiffiit pisortanit pigineqartut akornanni Illuut A/S ilanngaasikkanik ernialersukkanik akiitsoqarneraavoq. Tamannaluunniit kisiat

pissutigalugu immikkut aqutsisuuliinissaq professioneliusumillu siulersuisuliinissaq isumalioqqutigineqartariaqarpoq.

7.

Nukissiorfiit aktiaateqarluni ingerlatseqatigiiffingortitaanissaanni pitsaaqutit ajoqutillu pillugit misissueqqissaarnerit qaqugu inaarsarneqassasut Naalackersuisut naatsorsuutigivaat?

8.

Naalackersuisut isumaqarpat Great Greenlandip uninngasuutai ammit ikiliartortuarsinnassasut? Isertitat atukkallu oqimaaqatigiilernissaat angutserlugu akit atuuttut tunisallu qanoq katitigaanerit atuuttoq attallugit Great Greenland ukiumut amernik qassinik tunisaqartariaqartassava? Ammit uninngasuutit nalingata piviusorsiornerusumik nalilerlugu appartinneqarnera naammattoq Naalackersuisut isumaqarpat, qaffasissuserlu tamanna piviusorsiorortoq ingerlatseqatigiiffiup siunissami kiffartuussinissamik isumaqatigiissusiortarnissaanut sulilu aningaasaliiffigineqarnissamik pisariaqartitsisinnaaneranut sunniuteqassava?

9.

Ukiuni tulliuttuni tallimani Greenland Oil Spill Response A/S-ip ineriartornissaa Naalackersuisut qanoq ilimasuffigivaat? Ingerlatseqatigiiffiup niuernikkut tunngavigaa akiliuteqartitsilluni aatsitassarsiornermi ingerlatsivinnut oliaarluinnernik saliinernut atortunik atugassanngortitsisarnissaq. Ukiuni aggersuni sinerissap avataani annertuumik ingerlatsisoqarnissaa ilimagineqanngimmat Greenland Oil Spill Response A/S-ip aalajaallisarnissaa Naalackersuisut qanoq ilimasuffigivaat, aamma ingerlatseqatigiiffik qanoq angusaqarluarusussuseqarfigineqarpa?

10.

KNI A/S-ip namminermit naatsorsuutai kingulliit perusuppakka PolarOil-ip, Pilersuisup Neqillu immikkut naatsorsuutaat takuneqarsinnaaqqullugit. Tamakku avammut saqqummiuteqqusaassanngippata qinnutigissavara naatsorsuutit Inatsisartut Aningaasaqarnermut Ataatsimiititaliaannut aammalu Kukkunersiuinermut Ataatsimiititaliaannut nassiunneqassasut.

11.

Mianersukannersumik naatsorsuinerit ilimaginninnerillu aallaavigalugit ukiuni aggersuni Nunaoil A/S qanoq amerlatigisunik

aningaasaliiffigineqassangatinnearpa? Aningaasaliissutissatut atugassanik akiliisoqassanngippat sumik tunngaveqarluni isumalluortoqarnerata itisilerneqarnissaa kissaatiginarpoq.

12.

Royal Arctic Line A/S-ip assartuinermit akinik qaffaalersaarnera inuussutissarsiornermut tamarmut pinngitsoorani sunniuteqartussaassaaq suliffinnillu atuisunillu malugineqarsinnaasumik akit qaffanneqarnerannik kinguneqartussaassalluni. Ukioq 2014 eqqarsaatigalugu Aningaasaqarnermut Siunnersuisoqatigiit nalilerpaat siuariartortoqassanngitsoq taamaalillunilu 2013-imut naleqqiulluni pitsaanerussalluni. Taamatut Aningaasaqarnermut Siunnersuisoqatigiit naliliinertik ilaatigut tunngaveqartippaat aatsitassatigut ujaasinermit annikitsumik siuariartoqarnissaanik, aamma sanaartornermit aningaasaliissutit 2013-imut naleqqiullutik annikinnerusumik apparnissaannik. Assartuinermit akinik qaffaalersaarnerit Aningaasaqarnermut Siunnersuisoqatigiit siuariartortoqarnissaanut ilimasuutaannut Naalakkersuisut qanoq sunniuteqassangatippaat?

13.

Ukiualuit matuma siorna siunnersorteqarfiup Mantec Aps-ip nalunaarusiaani qulaajarneqarpoq Royal Arctic Line eqqarsaatigalugu 30 mio. kr. angullugit sipaaruteqartoqarsinnaasoq. Tamatuma kingorna suliniut taanna Ninngarummik taaguuteqartinneqartoq suliffimmi piviusunnngortinneqarpoq. Tassunga atatillugu paaserusuppara amerlanerusunik isertitsisoqartoqartariaqarnera Royal Arctic Line-mi qanga ilisimaneqalersimanersoq, aammalu assartuinermit akit qaffanneqarnissaat pinngitsoortinniarlugu qanoq iliuuseqartoqarsimanersoq? Ilanngullugu paaserusunnarpoq isertitassat amerlissutissaasa qanoq annertutiginerat suliffeqarfiup namminermit ersunneraa aammalu assartuussinermit akit naatsorneqartarneranni najoqqutassiat naapertorlugit assartuussinermit akinik qaffaanertut ilusilerlugit atuisunut qanoq annertutigisumik akiligassanngortitsisoqartariaqarsimanersoq?

14.

Naalakkersuisut nassuiaataat naapertorlugu Royal Greenlandip siunertaraa aalisarnermik ingerlatsinissaq aammalu inuussutissanik ingerlatsinerup iluani tunisassianik piareersaaneq niuerutiginninnerlu. Aalisarneq pillugu Naalakkersuisut inatsisitaassaata kinguneranik maleruaqqusatigut siunertani Royal Greenlandip allanngortittariaqalissannginnerpaa? Tamanna pillugu Royal

Greenlandip siulersuisui piginnittunit/Namminersorlutik Oqartussanit ilisimatineqareerpat?

(Inatsisartuni ilaasortaq Naaja H. Nathanielsen)

Tungavilersuut

Namminersorlutik Oqartussat aktiaateqarluni ingerlatseqatigiiffiutaat pillugit ukiumoortumik nassuiaat novemberimi Naalakkersuisut agguaappaat. Ajoraluartumilli nassuiaat taanna pillugu inimi oqallinnissamut Naalakkersuisunullu apeqquteqarnissamut ukioq manna Inatsisartut periarfissinneqanngillat.

Nassuiaat pillugu oqallittoqanngitsoornera uggornarluinnarpoq, tassami ilisimasassarpassuarnik imaqaralarpoq aallerfigineqarsinnaasunik naalakkersuinikkullu arlaleriarluni oqallittoqarsinnaagaluarmat.

Innuttaasut tamarmik inuunerat ingerlatseqatigiiffiit pisortanit pigineqartut sunnertarpaat. Taakkua ilaanni sulisuugaanni imaluunniit kiffartuussissutaannik atuisuugaanni (assartuinermi, ilaasunik angallassinermi, oqarasuaatitigut attaveqarnermi, internetimut attaveqarnermi il.il.) assigiippoq. Ingerlatseqatigiiffiutigut pillugit inuit kikkuulluunniit isumaqarput taamaammat ukiumut minnerpaamik ataasiarluni naalakkersuinikkut sukumiisumik oqallisigisassaqqippoq.

Maannangaaq kissaatigissavara apeqqutit tamarmik ullut suliffiusut qulit qaangiutsinnagit akineqareersimanissaat. Imaassinnaavoq apeqqutit ilaat ataasiakkaat nammineq taakkunannga akisassanngortillugit aktiaateqarluni ingerlatseqatigiiffinnut ingerlateqqinneqartariaqassasut, amerlanersaalli tassa piginnittunut apeqqusiaapput. Naatsorsuutigaara ingerlatseqatigiiffiutigut pillugit piginnittut isumaqassasut taakkualu oqaaseqarfigisinnaassagaat. Tunuarsimaartumik tungaveqarluni ingerlatsineq soorunami ataqqivara, aamma Naalakkersuisut qinnuiginngilakka siulersuisut sulinerat ingerlatseqatigiiffiilluunniit ulluinnarni ingerlatsinerat akuleruffigeqqullugit, taamaallaat qinnuigaakka pingaarnersiullutillu takorluuisinnaassuseqartumik isiginneqqullugit.